

廣陵覽古卷七

江都顧鑾謝唵氏述

南齊

亘公

寓居高郵結庵土山煉丹種藥歲久仙去因名其山曰神
居山至今產何首烏及諸藥

地輿廣記

邾道光

高郵人與其女居城西南迎仙橋井旁煉丹丹成與女皆
仙去後人名其井曰玉女井橋曰通仙橋

萬歷府志

廣陵覽古卷七

一

陳

杜僧明

字宏照廣陵臨澤人形貌眇小有勇力善騎射梁時從盧
安興後從陳祖爲主帥征交阯討元景仲並有功與蔡路
養戰於南野馬被傷陳祖馳往救之以所乘馬授僧明復
進因大敗路養高州刺史李遷仕將襲南康陳祖令僧明
等拒之連戰百餘日擒遷仕侯景遣于慶等寇江南陳祖
頓豫章令僧明爲前鋒所向克捷仍隨東討軍至秦州僧
明率麾下燒賊水門大艦及景平以功除明威將軍南兗

州刺史進爵爲侯

陳書

鑾按高郵州春秋時爲邗溝地屬吳後屬越戰國時屬楚秦并天下始於其地築臺置郵亭因名秦郵漢置高郵縣屬廣陵國東漢高郵屬廣陵郡三國時廢晉太康元年復立高郵縣屬臨淮郡南渡後於高郵之北阿鎮僑置幽州劉宋高郵屬廣陵郡大豫初析置臨澤縣屬海陵郡南齊因之梁析高郵置竹塘三歸二縣置廣業郡尋改爲神郡至隋開皇初廢郡又併竹塘三歸臨澤三縣入高郵屬揚州陳因蕭梁建置時仍號臨澤云

廣陵覽古卷七

二

宋

崔希甫

高郵人有才略宋將沈承禮攻江南請爲府判官江南平潘美薦於太宗召見拜太子中允面賜金紫命知原州召還拜監察御史凡朝廷更置諸道事務及指揮沿邊將帥多命希甫乘傳處分輒稱上意賜金帶仍命懸魚時號重

金御史子琮擢進士第

萬歷府志

桑景舒

高郵人皇祐五年進士善聽百物音知災祥又精於音律

嘗製虞美人曲對虞美人草鼓之輒動搖不已今其曲行於世

高郵舊志

喬竦

字立之高郵臨澤人教授州里倡明孔孟之教從遊者多以文行知名一時淮南數千里間共視高郵若齊魯孫龍圖覺亦其徒也卒贈朝奉大夫

高郵舊志

孫覺

字莘老高郵人少從胡瑗學登進士第嘉祐中擇名士編校昭文書籍覺首選進館閣校勘神宗卽位直集賢院擢

廣陵覽古卷七

三

右正言神宗將大革積弊覺言弊政固不可不革草而當其悔乃亡神宗稱其知言熙寧二年詔知諫院同修起居注知審官院王安石早與覺友善驟引用之將援以爲助青苗法行議者謂周官泉府民之貸者至輸息二十而五國之財用取具覺條奏其妄曰成周賒貸特以備民緩急不徒與也故以國服爲之息說者不明鄭康成釋經乃以王莽計贏受息無過歲什一爲據不應周公取息重於莽時况載師所任地漆林之征特重所以抑末作也今以農民乏絕將補耕助斂顧比末作而征之可乎國事取具蓋

謂泉府所領若市之不售貨之滯於民用有買有予并賒貸之法而舉之倘專取具於泉府則冢宰九職將安用耶聖世宜講求先王之法不當取疑文虛說以圖治安石覽奏怒始有遂覺意會曾公亮言畿縣散常平錢有追呼抑配之擾安石因請遣覺行視虛實覺既受命復奏言如陳留一縣前後曉示請錢卒無一人至者以此見民實不願望賜請罷安石以覺爲反覆出知廣德軍徙湖州松江隄沒水爲民患覺易以石隄下悉化爲良田歷知亳揚徐諸州知應天府入爲太常少卿哲宗卽位遷諫議大夫時諫

廣陵覽古卷七

四

官御史論事有限毋許越職覺請申唐六典及天禧初詔書凡發令奏事之未便皆得奏陳論宰相蔡確韓縝進不以德確自訟有功無罪覺隨所言折之確竟去縝白遷覺給事中辭曰間者執政畏人議已則遷官以餌之願與縝俱罷踰月縝去進吏部侍郎領右選改左擢御史中丞數月以疾請罷除龍圖閣學士提舉靈仙觀以歸覺有德量爲王安石所逐及安石退居鍾山覺駕往道舊從容累夕迨其死又作文以誄談者稱之所著有文集奏議春秋易

鑾按語林稱孫龍圖覺喜讀書晚年病目乃擇卒伍中識字稍解事者二人使其子取西漢左氏等書授以句讀每瞑目危坐室中命二人更讀於旁終一策則易一人飲之酒一盃使退卒亦自喜不以爲難又按宋史覺弟覽字傅師屢立邊功議論多觸執政遂遭黜削卒降爲寶文閣待制卒

孫升

字君孚高郵人治平二年進士哲宗立爲監察御史朝廷更法度逐奸邪升多所建明嘗上疏曰自二聖臨御登用

廣陵覽古卷七

五

正人天下端良之士俊偉之才俱收並用近世得賢之盛未有如今日者願於耳目之臣論議之際置黨附之疑杜小人之隙疑間一開則言者不安其職使循默之風熾而壅蔽之患生非朝廷福也遷殿中侍御史以梁燾事出知濟州踰年提點京西刑獄復拜侍御史論翰林承旨鄧伯溫草蔡確制稱其定策功比漢周勃欺天負國豈宜親承密命不報紹聖初翟思張商英摭升過劾之削職知房州再貶果州團練副使汀州安置卒

宋史

喬執中

字希聖高郵臨澤人父竦教授里中從遊多以文學知名
執中初入太學補五經講書五年不謁告王安石見而器
之命子弟與之遊治平四年擢進士調須城主簿時河役
大興部使者不得人一夕譟而潰致大獄執中往代遂帖
然富民賂吏將創橋所居以罔市利執中疏其害使者入
吏言使成之執中曰官可去橋不可剗也卒不能奪王安
石爲政引執中編修熙寧條例選提舉湖南常平時張惇
討五溪檄執中取大田離子二峒峒路險絕期迫執中但
走一校諭其酋卽相率歸命召爲司農丞提點開封縣鎮

廣陵覽古卷七

六

諸縣牧地民耕歲久議者將取之當夷邱墓伐桑柘萬家
聚泣執中請於朝詔復予民改提點京西北路刑獄時河
決廣武埽危甚相聚莫敢登執中不顧立其上衆隨之如
蟻附不日埽成元祐初爲吏部郎中遷起居郎權給事中
有司以天下讞獄失出入者同坐執中駁之曰先王重入
而輕出卹刑之至也今一旦均之非好生之意也進刑部
侍郎紹聖初上官均撫執中爲吕大防所用以寶文閣待
制知鄆州執中有仁心屢典刑獄活以百數一夕夢神人
昇以騎都尉詰旦爲客言之少焉談笑而逝

宋史

崔公度

字伯易高郵人口吃不能劇談而內絕敏劉沆薦茂才異等辭疾不應用父命補三班差使非其好也益閉戶讀書歐陽修得其所作感山賦以示韓琦琦上之英宗卽付史館授和州防禦推官以母老辭英宗召對延英殿進光祿丞遷崇文校書刪定三司令式元祐紹聖間歷兵禮部郎中知潁潤宣通四州直龍圖閣卒所著有曲轅集四十卷詩賦百篇

宋史

鑾按補世說云公度嘗與文與可同館職一日見與可京

廣陵覽古卷七

七

南殊無言及將別但云明日復來乎與子話公度意以話爲畫明日再往與可曰與公話則左右顧恐有聽者公度方知其將有言非畫也與可曰吾聞人不安語者舌可過鼻卽吐其舌三疊之如餅狀引之至眉間公度大驚及京中傳與可死公度乃悟所見非生者

朱壽昌

字康叔揚州天長人徙居高郵以父巽蔭試將作監主簿歷知閩州鋤姦擿伏郡稱爲神遷知廣德軍壽昌母劉氏巽妾也初巽守京兆母劉氏方娠而出壽昌生數歲始歸

父家母子不相聞五十年後壽昌行四方求之飲食罕御
酒肉言輒流涕熙寧初與家人辭訣棄官入秦曰不見母
吾不反矣行次同州得之劉時年七十餘嫁黨氏有數子
悉迎以歸京兆錢明逸以其事聞詔還就官由是以孝聞
天下壽昌以養母求通判河中府數歲母卒居喪幾喪明
既葬有白鳥集墓上拊同母弟妹益篤累官司農少卿遷
中散大夫

宋史

鑾按蘇軾有賀壽昌刺血寫經求母五十年得之蜀中詩
云嗟君七歲知念母憐君壯大心愈苦羨君臨老得相逢

廣陵覽古卷七

八

喜極無言淚如雨不羨白衣作三公不愛白日昇青天愛
君五十着綵服兒嘑卻得償當年烹龍爲炙玉爲酒鶴髮
初生千萬壽金馬詔書錦作囊白藤肩輿簾蹙繡感君離
合我酸辛此事今無古或聞長陵竭來見大姊仲孺豈意
逢將軍開皇苦桃空記面建中天子終不見西河郡守誰
復譏潁谷封人羞自薦

秦觀

字少遊高郵人少豪雋能文舉進士不第見蘇軾於徐州
爲黃樓賦軾以爲有屈宋才介其詩於王安石安石亦謂

其語似鮑謝軾勉以應舉爲親養始登第調臨海主簿蔡州教授元祐初軾以賢良方正薦於朝除太學博士校正祕書省書籍遷正字復兼國史院編修官紹聖初坐黨籍出通判杭州御史劉拯論其增損實錄貶監處州酒稅使者承風旨伺其過無所得則以謁告寫佛書爲罪削秩徙郴州繼編管橫州又徙雷州徽宗立復宣德郎還至藤州遊華光亭爲客道夢中事索水飲水至而卒先自作輓詩語哀甚有淮海文集共四十卷觀長於議論文麗而思深及死軾深惜之弟覲字少儀覲字少章皆能文子湛字處

廣陵覽古卷七

九

度亦以文名

參宋史高郵志

王鞏

字定國莘縣人爲揚州倅居高郵以詩酒自娛從蘇軾遊軾守徐鞏往訪之與客遊泗水登鼉山吹笛飲酒乘月而歸軾觴之於黃樓上謂鞏曰李太白死世無此樂三百年矣軾得罪鞏亦坐謫監濱州鹽稅在濱窮經著書豪氣不少挫罷還注論語十卷上之朝

嘉靖惟揚志

馬永卿

字大年高郵人大觀元年進士初赴永城縣簿外家張氏

諸舅命其求教劉待制元城永卿到任卽上謁元城問王鞏安否蓋定國時居於郵也永卿答曰王學士安元城因謂永卿可教曰後生不稱前輩字此爲知禮永卿自是日造其門所與問答莫非粹言要論皆載所撰元城語錄中後永卿官終左朝請大夫

萬歷府志

陸仲仁

高郵人精繪事嘗畫王右軍支道林許遠仁三高圖獻晁以道張表臣題詩於後中有句云已有雲氣翳鳳麟六百餘歲無斯民想像璧月何當親虎頭摩詰俱沉淪誰其畫

廣陵覽古卷七

十

者陸仲仁遠紹乃祖高無倫以道歎曰後世視陸生不知

當爲何等人耶

萬歷府志

曹仁熙

高郵人善畫水米芾畫史云高郵寺壁水乃仁熙畫一筆長丈餘水勢分激如崩劃有聲世所寶惜張表臣觀仁熙畫水作詩呈晁以道云曹生畫水信有神豪端風雨生淵汙波濤不合來翻屋蛟鶚何須欲噬人末又云此身端的老江湖雨笠煙蓑是所圖他年但飽揚州米此日寧論甓社珠以道覽之曰此詩波瀾亦可駭矣其畫爲名公稱許

如此 高郵舊志

陳造

字唐卿高郵人年踰二十直院崔大雅奇其才勸以求仕
初調繁昌尉既分教姑蘇范成大見其詩文曰唐卿亦高
郵人使遇歐蘇盛名當不在少游下尚書尤褒得其騷詞
雜著手之不置尋宰定海倅房陵攝郡事皆有最績兩爲
試官亦稱得人官至淮浙安撫使參議晚年自號江湖長
翁有詩文雜著四十卷 萬歷府志

翁彥約

廣陵覽古卷七

十一

字行簡崇安人政和二年進士知高郵軍郵當江淮孔道
商旅出入多以貿易茶鹽爲業姦民計圭撮銖兩之私連
逮抵罪者不可勝計彥和初下車有告訐者片言立決案
無留牘吏猶欲以支辭蔓其獄彥約曰兩獄充斥若等尚
恨少耶吏錯愕失對不敢倚法爲姦一郡相慶歲大旱步
禱疲甚旣雨得疾或以是尤之彥約曰民蘇而吾病吾無
憾矣乞休未報而卒行道之人莫不出涕 高郵舊志

顏筆仙

無姓名高郵人少落魄江湖建炎初鬻筆遇仙日售筆十

管則止轉運使見之間曰能飲否曰可飲一斗飲畢長揖而去遺所攜筆藍俾左右取還之盡力莫能舉凡得其筆者剖視管中必有一詩或紀其破毀歲月及人禍福姓名無不驗故以筆仙稱之年九十二一日積葦庭中坐其上自舉火焚之人見烈焰中乘火雲飛昇而去

嘉靖惟揚志

趙默

字子聲高郵人紹興乙丑赴禮部試其婦兄臧倬語之曰子聲必登高第昨夢吳興葉利用先生得官與君俱往賀焉上馬回首則君亦着藍袍吾殊爲君喜暨揭榜葉中選

廣陵覽古卷七

十二

而默不然至來春又試倬復語之曰吾侍妾韻兒爲君作一夢嘉兆默笑曰前已不驗豈復兒戲耶謾叩之倬曰此妾昨早持一手帕來用絨刺狀元及第四字其上至夕夢吾手執帕而爲趙姑夫所奪君必魁天下無疑旣又不然後數年倬死淳熙戊戌乃用累舉恩試大廷爲第一人始念倬夢上馬回首者蓋拜官在其身後而韻兒之夢歷二十七年乃驗云

嘉靖惟揚志

汪立信

字成甫六安人咸淳十年爲荊湖制置使元兵日迫以三

策移書賈似道似道得書怒抵之地詬曰瞎賊狂言敢爾
中以危法廢之元兵大舉伐宋似道出師江上召立信爲
江淮招討使俾就建康府庫募兵援江上諸郡立信受詔
卽日上道以妻子託其將金明執其手曰我不負國家爾
必不負我遂行與似道遇蕪湖似道拊立信背曰不用公
言以至於此立信曰瞎賊今日更說得一句不似道問立
信何向曰今江南無一寸乾淨土某去尋一片趙家地上
死第要死得分明耳旣至建康守兵悉潰四面皆元兵立
信乃率所部數十人至高郵欲控引淮漢以爲後圖及聞

廣陵覽古卷七

十三

似道師潰歎曰吾今日猶得死於宋土也乃置酒召賓佐
與訣手爲表起居三宮與從子書屬以家事夜分起步庭
中慷慨悲歌握拳撫案者三遂失聲三日扼吭而卒後伯
顏聞其策歎曰宋有是人若果用之我安得至此求其家
厚恤之

宋史

元

龔璠

字子敬高郵人善屬文工書有晉人風格憲舉和靖學道
兩書院山長官寧國路儒學教授調宜春丞以江浙儒學

副提舉致仕後寓家吳門所著有存悔齋集

嘉靖惟揚志

李齊

字公平廣平人知高郵府至正十三年張士誠爲亂陷泰州行省遣齊招降被拘久之縱歸令守甓社湖士誠尋據高郵城已而有詔赦之詔至不得入賊給曰李知府來乃受命行省強齊往至呼齊使跪齊曰吾膝如鐵豈爲賊屈士誠怒扼之跪齊立而詬之乃曳倒槌碎其膝而舁之齊舉進士第一時謂不負所學云

元史

以上高郵州

廣陵覽古卷七

十四

宋

元生先

無姓名熙寧間人遊興化館於鬻金賈氏會邑宰嗔其金有贖先生掘地熾炭置金其中卽成赤金運神術能爲人起死一日謂賈曰吾將去能從我遊乎言訖設一葦席坐溪上泛泛然不知所往

興化舊志

胡滋

王介甫子雱爲待制卒興化尉胡滋妻宗室女也自言夢中人衣金紫云王待制來爲夫人兒妻尋產子介甫聞之

自京師至金陵與夫人常坐於船簾下見船過輒問得非胡尉之船乎既而得之舉家悲喜亟撫視涕泣遺之金帛不可勝數邀與俱還金陵滋言有捕盜功應詣銓求賞介甫使人爲營致除京官留金陵且半年欲得其兒其母不可乃遣之

嘉靖惟揚志

時丹立

興化人元祐間任高郵司理涖政仁恕民德之鄉人稱其所居曰時堡卒秦觀以詩挽之有懸知青史上又載一于

公之句

興化舊志

廣陵覽古卷七

十五

俞集

溧水人宣和中赴泰州興化尉挈家舟行淮上多蚌蛤舟人日買以食集見必輒買放諸江他日得一藍甚重衆欲烹食倍價償之堅不可遂寘諸金中忽大聲從釜起光焰相屬舟人大恐熟視之一大蚌裂開現觀世音像於殼間其傍有竹兩竿如生菩薩相好端嚴冠衣瓔珞及竹葉枝幹皆細珠綴成者集令舟中皆誦佛悔罪而取其殼以歸

堅夷志

陳俊卿

字應求興化人登進士第累遷中書舍人時孝宗志在興復方以閩外事屬張浚以浚卿忠義沈靖有謀卽本職充江淮軍撫判官興元初建都督府浚卿除禮部侍郎參贊軍事張浚初謀大舉北伐浚卿以爲未可及浚請出師已而兵潰浚卿退保揚州主和議者幸其敗議罷浚都督改宣撫使治揚州浚卿奏浚果不可用別屬賢將若欲責其後功降官示罰古法也今削都督重權寘揚死地人情解體尙何後效之圖疏再上上悟卽復浚舊職且召爲相浚卿官至同平章事以少師魏國公致仕卒諡正獻

宋史

廣陵覽古卷七

十六

方信孺

字孚若興化軍人有雋才開禧間三使金能以言辭折強敵不辱君命累遷淮東轉運判官兼提刑知眞州卽北山水壇築石堤袤二十里人莫測其所爲金人薄城守將決堤退敵城以獲全

舊載儀縣志

徐景

嘉定中爲興化令楚賊胡德等率衆掠縣景諭以逆順禍福賊怒欲害之景曰人誰無死得死王事何憾但勿殘吾民賊義之不加害景練兵設備數月賊平

興化縣志

郭忠

字恕甫興化人時仁宗后喪明忠以針愈之賞賜甚厚賜號金針先生有傷寒直格行世

興化舊志

元

董搏霄

字孟起磁州人至正十四年以樞密院判官從丞相脫脫駐高郵分戍鹽城興化賊巢在大縱得勝兩湖間凡十餘萬悉勦平之卽其地爲芙蓉砦賊入輒迷故道盡殺之自是不敢復犯後授淮南行院判官十八年拜河南右丞與

廣陵覽古卷七

十七

賊毛貴猝遇拔劍督戰賊突前刺殺之無血惟白氣衝天

元史

高椿

江都人元季避亂姑蘇張士誠據吳郡遣幣聘之椿峻拒不就閉戶讀書歸隱興化

康熙府志

以上興化縣

漢

臧旻

廣陵射陽人有幹事才熹平元年會稽妖賊許昭起兵句

章攻破城邑衆以萬數拜旻揚州刺史進兵連戰破之遷旻爲使匈奴中郎將還京太尉袁逢問其西域諸國土地風俗人物種數旻具言道里近遠人數多少風俗燥濕山川草木鳥獸異物名種不與中國同者口陳其狀手畫地形逢奇其才歎曰雖班固作西域傳何以加此轉拜長水校尉終太原太守

參後漢書謝承漢書

鑾按府志寶應秦時屬九江郡漢置平安縣屬廣陵國新莽改曰杜鄉東漢屬廣陵郡漢末改曰安宜晉縣省地入射陽蓋縣有射陽湖射陽鎮射陽阜也

廣陵覽古卷七

十八

三國魏

陳琳

字孔璋廣陵射陽人初爲何進主簿進欲誅宦官太后不聽進乃召四方猛將並使引兵向京城欲以劫恐太后琳進諫曰易稱卽鹿無虞諺云掩目捕雀夫微物尚不可欺以得志况國之大事可以詐立乎今將軍總皇威握兵要龍驤虎步高下在心以此行事無異鼓洪爐燈毛髮但當速發雷霆行權立斷而反釋利器更徵他兵倒持干戈授人以柄祇爲亂階耳進不納竟以取禍琳避難冀州袁紹

使典文章爲檄討曹操袁氏敗歸操操謂曰卿昔爲本初遺書但可罪狀孤而已何乃上及父祖耶琳謝罪操愛其才不咎以爲司空軍謀祭酒管記室軍國書檄多琳作也徙門下督卒始五官將不及平原侯植皆好文學琳與王粲徐幹阮瑀應瑒劉楨孔融並見友善號建安七子

魏志

鑾

按典略曰琳作諸書及檄草成呈操操先苦頭風是日

疾發臥讀琳所作翕然而起曰此愈我病數加厚賜

唐

尼真如

廣陵覽古卷七

十九

姓李氏嫁於賀若氏舍俗爲尼天寶元年七月七日真如於鞏縣精舍盥濯忽有五色雲自東來雲中引手不見其形以囊授真如曰寶之慎勿言天寶末安祿山亂真如展轉流寓於楚州安宜縣上元二年建子月十八日夜見二人皂衣引真如東南行可五六十步樓觀嚴飾兵衛森肅皂衣者曰化城也殿上一人衣碧衣戴寶冠稱天帝有二十餘人衣冠亦如之呼爲諸天命真如進諸天相謂曰下界殺戮過多腥穢達於諸一大當以神寶壓之一天曰用第三寶又一天曰今沴氣方盛三寶不足以勝須以第二寶

授之曰然因出寶授真如曰汝往令刺史崔旆進於天子前所授小囊有五寶人臣可見今八寶惟王者得見慎勿易也具以寶名及所用之法授真如復令皂衣者送之翌日真如詣縣以狀聞刺史以爲妖令從事盧恒就訊真如以囊中五寶示恒出寶盤照之光皆射日仰望不知所極恒異之白於旆聞之節度使崔圓圓召真如詣府欲歷視之不可固強之真如不得已乃出八寶置之日中則白氣貫空措諸陰室則照燭如月旆遣盧恒隨真如上獻時肅宗寢疾召太子謂之曰汝自楚王爲儲嗣今獲寶於楚州

廣陵覽古卷七

二十

天賜汝也代宗拜受賜因改元寶應以安宜縣爲寶應縣今真如所居得寶地在河壩景物暢茂相傳西域賈人過其旁者無不望而瞻禮也

康熙府志

宋

徐天錫

字日休故吳忠武王溫之後幼有奇志以學自業天禧中以進士起家累遷著作郎知寶應縣時寶應之人大饑疫募民出米爲饘粥以食民聚醫藥以治病者其家屢戒之使自愛無身行民間以切近病人天錫以爲令當然不聽

也竟卒以疫後二十五年甥呂倚過寶應吏民猶能記其
卒之年月日時蓋稱念不亡也王令廣陵集
以上寶應縣

漢

董永

海陵西溪鎮人少失母獨養父父亡貧不能葬乃從人貸
錢一萬以身作傭葬畢道遇一婦人求爲永妻永與俱詣
錢主令織絹三百匹以償甫一月而畢辭永去曰我天上
織女也緣君至孝上帝命我織絹償債言訖凌空去今丁

廣陵覽古卷七

二十一

溪場永與父墓並存

參方輿勝覽諸舊志

三國吳

呂岱

字定公海陵人初爲郡縣吏孫權召署錄事出補餘姚長
募精健千人平定會稽賊督十將取長沙三郡留鎮長沙
又與魯肅禽斬叛將遷廬陵太守代步隲爲交州刺史降
高涼賊帥又討鬱林夷賊破之桂陽滇陽賊起詔岱討之
斬首獲生萬餘人封都鄉侯交阯太守士燮卒其子徽不
受朝命岱請急進兵徽肉袒降斬之進封番禺侯岱旣平

交州復進九真斬獲以萬數進拜鎮南將軍還鎮長沙會
武陵蠻叛岱與潘濬共討定之廬陵會稽賊並起岱督劉
纂唐資等分部討擊皆見斬獲廖式作亂諸郡搔擾岱自
表輒行悉討斬之時年已八十拜上大將軍晉大司馬岱
清身奉公初在交州歷年不餉家妻子饑乏權聞歎息以
讓羣臣加賜錢絹始岱親近吳郡徐原慷慨有才志岱知
其可成賜巾襦與共言論後遂薦拔官至侍御史原性忠
壯好直言岱時有得失原輒諍又公論之或以告岱岱嘆
曰是我所以貴德淵者也原死岱哭之甚哀曰德淵岱之
益友今不幸岱復於何聞過談者美之卒年九十六遺令
殯以素棺疏布葬送制從儉約子凱皆奉行之

吳志

晉

樂子長

海陵人白日飛昇今樂真橋乃其遺跡當時號爲樂真人
云梁昭明太子至海陵以樂子長故宅爲觀

泰州舊志

王冶

海陵人隱居天目山修靈寶法煉丹存神歷宋齊梁百餘
年白日飛昇有羣仙導引步虛清樂之音四遠皆聞山有

二井封鑄甚密藏靈寶符杖履水襪隱形帽於左丹井梁
昭明太子聞治昇舉同邵陵王綸詣山致禮

嘉靖惟揚志

王鹿女

海陵人王治居天目山時有五色鹿產一女於山左草間
治聞啼聲往視之見鹿乳焉治養於庵至七歲爲築鹿女
臺居之治飛昇後女欲南渡邑人餞之橫浦云後百年復
來履江水而去唐景雲二年十一月山忽鳴聲聞遠近適
勅遣天台山女道士王妙行行天下名山大川洞天福地
投金龍玉璧王妙行卽鹿女計其時正百年矣

名勝志

廣陵覽古卷七

二十三

劉宋

劉善明

泰始中爲海陵太守郡邊海無林木善明課種榆櫝後獲
其利人咸德之

泰州舊志

隋

賀若弼

洛陽人開皇元年爲吳州總管與史萬歲韓擒虎帥兵同
至海陵征捕海寇八千郡人念其功立祠忠義河側後以
平陳功封宋公

晏溪志

法響

海陵李氏子年十六出家多神奇縣有虎害響設齋召虎
虎悉至彌伏不動響杖其脛與背自是絕跡唐初於濟川
鎮南小孤山建寺以居涅槃後弟子造浮圖葬之名伏虎
禪師祠禱雨輒應後山墊於江徙祠北岸至今歲旱縣人
迎以禱雨

康熙府志

五代

荆罕儒

冀州人周顯德初授泰州刺史世宗幸泰州以罕儒爲團

廣陵覽古卷七

二十四

練使賜金帶銀器鞍勒馬六年春軍吏耆艾詣闕請留恭
帝詔褒之罕儒輕財好施在泰州有煮海之利歲入鉅萬
詔聽十收其八用猶不足家財入有籍出不問其數雖不
知書好禮接儒士然驍勇善戰不顧勝負常欲削平太原
志未果而及於害人皆惜之

宋史

宋

胡令儀

陳留人淳化至道間以大理評事令海陵法無假貸吏民
憚之天聖中任發運使先是范仲淹請築捍海堰甫役會

大雨雪驚濤洶湧役夫有旋濘而死者謹言堰不可成朝廷以令儀會令海陵命爲淮南轉運使按役之可否令儀力主仲淹議不可奪堰卒成民至今利之州人於張范祠增祀令儀爲三賢祠

泰州舊志

曾致堯

南豐人咸平中知泰州有山亭六詠詩後子易占知如臯

紹聖中孫肇復典是郡因立三至堂焉

名勝志

歐陽觀

廬陵人由綿州軍事推官於大中祥符三年移監泰州軍

廣陵覽古卷七

二十五

事判官時子修甫四歲觀卒於任囊底蕭然妻扶櫬歸葬

吉水縣瀧岡課督其子爲宋名臣

泰州舊志

晏殊

字同叔撫州人嘗官泰州西溪故溪亦以晏名本鎮有書院有南風亭皆殊所也范仲淹居政府時有詩云誰道西溪小西溪有大才參知兩丞相曾在此中來仲淹與殊俱嘗官此故云殊歷官觀文殿大學士卒諡元獻

泰州舊志

變

按晏元獻赴杭州道過惟揚憇大明寺瞑目徐行使傳吏誦壁間詩板戒勿言爵里姓名終篇者無幾又俾別誦

一詩問名則江都尉王琪作卽召至同飯畢同步遊池上
時春晚已有落花因言每得句書牆壁間或彌年未嘗得
聯且如無可奈何花落去至今未能對王應聲曰似曾相
識燕歸來公大歎賞自此辟薦館職遂躋侍從事出類志

范仲淹

字希文蘇州吳縣人舉進士第歷監泰州西溪鹽稅遷右
司諫時歲大蝗旱江淮滋甚仲淹請遣使循行未報乃請
間曰宮掖中半日不食當何如帝惻然乃命仲淹安撫江
淮所至除淫祀賑乏絕民有食烏昧草者擷草以進請示

廣陵覽古卷七

二十六

六宮貴戚戒其侈心因陳八事以諫除參知政事會盜起
淮南州縣官有不能守者朝命悉按誅之仲淹曰平時諱
言武備寇至專責守臣死事可乎守令由是皆免死以資
政殿學士遷戶部侍郎卒諡文正

參宋史東都事略

滕宗諒

字子京河南人天聖中爲郡從事建文會堂招延賓友時
范仲淹監西溪與宗諒談論相得胡瑗亦以文行爲宗諒

所厚

康熙府志

趙抃

字閱道衢州西安人進士及第知海陵崇學校重師儒不立異政以拂民情因俗施教寬猛不同惟以惠利爲本夜坐必衣冠露香告天不可告則不敢爲也至和初參知政事後新法興極論不可而去卒贈太子少師諡清獻

參宋

史嘉靖惟揚志

陸佃

字農師吳縣人紹聖四年知泰州州有淮東道院佃到任謝表云飛蚊漸少頗無澤國之風過客甚稀至有道院之號是年建貢院開鳳凰池置堂閣亭庵以經術課士以平

廣陵覽古卷七

二十七

易臨民事簡政清人甚感頌

泰州舊志

鑾

按名勝志云宋貢院在南山寺西紹聖初陸佃爲守時建內有鳳池朝陽守雌二亭鷗閣鳧庵凡六十二所

張次山

通州人進士元祐初知泰州見水鸛集戒石前長鳴若訴次山諭使先飛令胥隨之鸛止大樹上蓋近鄰有烹其二雛者卽拘其人至鸛亦飛來次山爲斷罰之鸛乃飛去後

爲西京轉運判官

泰州舊志

徐守信

泰州人號神翁居天慶觀遇異人授仙術言吉凶禍福如響徽宗嘗召入朝言事多驗高宗時爲康王叩以國事與之詩曰牡蠣灘頭一艇橫夕陽西下待潮生與君不負登臨約同上金鰲背上行後高宗避金兵入海爲淺沙所滯待晚潮行上問此何處曰牡蠣灘登岸問何山曰金鰲山因思神翁語乃屏蹕易衣入臨濟寺見此詩新書於壁墨蹟未乾始知翁爲異人

嘉靖惟揚志

潘汝一

字古玉海陵人博貫經史工爲文靖康初徽宗南幸童貫

廣陵覽古卷七

二十八

等勸渡楊子汝一至江都上書乞回鑾慰天下建炎間許容攝州事降金汝一不食者數日所親強之乃起金將遣人通意且曰不獨免死孤城將北偕濟上富且貴焉汝一罵曰吾生於宋死於宋闔門爲忠義鬼含笑入地矣容欲作賀僞齊表召之不往金又命容擇文士草檄容迫遣之汝一以死拒金人取城中圖書或求其所著文以獻汝一指篋曰此豈可充雞林庭幣邪鄉人高之紹興中以進士久次得官更歷州縣卒有羣玉府鳳池集共二十卷

嘉靖

惟揚志

岳飛

字鵬舉相州湯陰人以應募屢戰皆捷建炎四年遷通泰鎮撫使兼知泰州飛辭乞淮南東路一重難任使收復本路州郡乘機漸進使山東河北河東京畿等路次第而復會金攻楚急詔張俊援之俊辭乃遣飛行而命劉光世出兵援飛飛屯三壑卽今三壑鎮爲楚援尋抵承州三戰三捷殺高太保俘酋長七十餘人光世等皆不敢前飛師孤力寡楚遂陷詔飛還守通泰有旨可守卽守如不可但於沙洲保護百姓伺便掩擊飛以泰無險可恃退保柴虛戰於南

廣陵覽古卷七

二十九

霸橋金大敗渡百姓於沙上飛以精騎二百殿金兵不敢近後官少師樞密副使封武昌公爲秦檜所害追封鄂王

諡武穆 宋史

萬鍾

字元亨錢塘人淳熙十年知泰州購名書藏於州學修城東南北三水門建譙樓其上增祀胡瑗王居正於三賢祠鍾以儒雅飾吏事澹然不事功利而蠱弊盡除民甚德之

嘉靖惟揚志

堯允恭

字克遜海陵人景定咸淳兩領鄉薦宋亡專意經傳邃於易深得性命之理江浙行省兩檄充濂溪東川書院山長允恭皆不赴安貧樂善學者多從遊自號觀物老人大司農燕公嘗稱其古心絕俗清氣逼人有詩文二十卷

嘉靖

惟揚志

唐甘弼

海陵人初爲小吏廉恪無他技一日晨出若有所遇忽裂巾毀履褻語裡裡家人以爲狂語中休咎人始稍就占訊喜怒語嘿無不驗張榮來據城聞其神異執於大雪中露

廣陵覽古卷七

三十

坐左右數尺獨無雪髮膚略不沾潤乃積雪丈餘穿洞穴埋其中彌日出之怡然也後抱薪自焚有田夫中途遇之問先生安往曰吾歸也八城聞其已自焚矣葬響林原歲餘有見之於江右又蜀人亦見之青城云

泰州舊志

元

袁智

字道濟泰州人世爲丁溪鹵戶至正間父敬夫爲總催劉正二虐辱死智周誓復讐陰佩刀伺間便凡六年會正二爲人所殺乃以刀棄之邗溝州守趙儼上其事旌之

參梧